

Pronostica- tion generale, pour quatre cens quatre vingts dixneuf ans, Calculee sur
Paris, & aultre lieux de mesme lon- gitude.

Publication Paris, imprimé nouvellement : 1561

Description In-12. Pièce

Cote et fonds RES-YE-4621, Tolbiac - Rez de jardin - Magasin

**PRONOSTICA-
TION GENERALE,**

POUR QUATRE CENS

quatre vingt dixneuf ans,

Calculee sur Paris, &

autres lieux de

mesme lon-

gitude.



Imprimée nouvellement à Paris,
mille cinq cens soixante vn.

Handwritten text, likely bleed-through from the reverse side of the page. The text is extremely faint and illegible due to the quality of the scan. It appears to be a list or a series of entries, possibly containing names and dates, but the characters are too light to be accurately transcribed.

PROLOGVE.



Vand tout sera bien ruminé,
Cerché, compris, examiné,
Mis & compté sur le bureau,

L'on trouuera plein tomberau
De Pronostifications,
Arrests, astrologations,
Et d'Almanachs plus d'une année,
Forgez pour la presente année.

Mais tout fueilleté ça & la,
Dequoy nous profite cela,
Sinon d'un paüetemps Michaults:
Car de dire qu'il fera chault,
Ceil esté, qui ne l'entendrait:
Et de dire qu'il sera froid
C'est yuer, ebacon le sçait bien:
Mais de dire quand, & combien,
Cela, c'est affaire aux asniers:
Le grand calendrier des bergers
En monstre tresbien la leçon.
Toutefois, si est la façon
A mon auis trop glorieuse,
Et la matiere fort fascheuse

De vouloir sur Dieu entreprendre.
Penseriez-vous qu'on peust com-
prendre

Par folles imaginatiues,
D'estoilles courante & restiues,
Les secrets du grand Gouverneur!
Et ie vous supply, quel honneur
Luy fait-on, de vouloir escrire
Ce qu'autre que luy ne peut dire!
Si les anciens philosoffres,
Ont de tels cas rempli leurs coffres,
Disant: voyla Sol, & Saturne,
Voyla Venus, voyla la Lune,
Voyla le chariot branslant,
Le cornet, le Dragon vollant,
Voyla Mars tenant sa banniere,
Voyla l'estoille poussiniere.
Et mille telles resueries:
S'ensuit-il que leur confraries
Rendent les bons Chrestiens plus sa-
ges!

S'ils nous rapportoyent les messages
Des folies qu'ils ont inuentees,
Ie les aurois pour redoutees:

Mais ie doute, & les tiens pour tels,
Qu'ils ne soyent pas la hault montez.
Parquoy gentils astrologueurs,
Subtils, plaisans epilogueurs,
Si n'avez autre chose a viure,
Ie vous pry cachez vostre liure:
Car ie doute qu'il ne vault rien:
Comme cy apres verrez bien:
Par nostre certain horoscope:
Duquel ia ne fault qu'on sincopé:
Ou qu'on y adiouste vn seul cas:
Car les esprits esperlucars,
N'y pourront que mordre ne rires:
Et qui ce moyen voudra suyure:
Puis apres, en prenne l'exemple;
La matiere est bien assez ample.

DES QUATRE
PARTIES DE
l'annee, & de leurs
dispositions.

Nous deduirons en premier
point,

Puis que le cas vient si à point.

~~Les quatre parts de nostre annee,~~

Qui puis la premiere ame nee
Ont esté tousiours en valeur.

L'hyuer ha le premier honneur:

Le printemps suit, l'esté suruient:

L'arriere saison sus reuient:

Et puis tousiours recommençant,

Vn an eschet, l'autre passant:

De sorte, que sans y penser,

C'est tousiours à recommencer.

Or suyons donc l'ordre susdit

De l'hyuer, que le printemps suit.

L'HYVER.

L'Hyuer, à ce que puis entendre,
Sera froid ou sec, ou bien tendre,
Catarreux pour gens fort replets:
S'ils n'ont assez de deux bonnets,
En pourront mettre vne douzaine.
Mal vestuz auront prou de peine,
~~Si auront bien les mal chauffez~~
Et doute fort que noz fossez
Au degel ne soyent tous remplis.
Robbes fourrees à plusieurs plis
Cest yuer seront de saison.
Nous aurons perdus à foison,
Et d'oiselets s'il gele fort.
S' Aquarius faict son effort
Sur le degel, nous serons mal:
Et qui n'aura point de cheual
A cest heure la, si en cherche,
Ou se monte sur vne perche:
Car Paris sera si fangeux,
Et le chemin si outrageux,
Qu'il fera bon porter galoches.
Ce temps graissera force broches,

Et fera mainte rouge fesse:
Godailleurs nourris de paresse
N'encheriront ia les fagots.
Il fera gris pour les bigots,
Et ferrera pour ces tendrettes:
Mais au fort, les chambres secrettes
Leur aideront en cest affaire:
Voyla que l'hyuer pourra faire.

D V P R I N T E M P S.

LE renouveau, qu'on dit Printemps,
En fera d'aucuns malcontens
Qui ne se seront bien gardez:
Signamment noz mignons fardez,
Noz gentils galants morfondus,
Ou bien noz nouveaux refondus
A qui faudra porter calottes:
Calottes, sont coeffes mignottes
Couvertes d'un beau fin velours,
Que mignons portent tous les iours,
Pour contregarder leur cerueau.
Or retournons au temps nouveau.
Ce temps est taillé de gelee:

La vigne en seroit affolee
Quand les bourions seroyent faillis,
Et si les vins estoient faillis
Que deuiendroyent ses bons supplots:
Rinceurs de godets & de pots,
Auroyent perdu belle saison.

Mettons nous donc en oraison
Que ce fascheux air ne nous nuise.
Pescheurs prendront force menuise
Ce printemps, car l'eau sera trouble:
C'est adonc que l'on pesche au dou-
ble,

Car lors le poisson n'y voit goutte.
Sur le moys de May, l'espargoutte
Sera bonne avec l'Aluync.

Et s'il fait frimats ou bruynne,
Nous aurons chenilles à force:
Mais la belle paire de force,
Attachee au bout d'une perche
Lear fera peur: car on les cherche
En ce temps dessus les pruniers,
Pour le profit des cousturiers.

En May Zephirus soufflera,
Et par droict tout reuerdira,

Herbes, & Arbres floriront:
Mais s'il pleut trop, taillez seront
D'auorter, & perdre leurs fruiçts.
Or sont desia deux temps desdaiçts,
Et pronostiquez à peu pres:
Venons donc à l'autre d'apres.

L'ESTÉ.

L'Esté, c'est vn mauuais paillard,
Il eschauffe, il consume & ard
S'il n'est attrempe d'auenture:
Car quant à sa propre nature
C'est d'estre chault & sec à tout,
Du commencement iusqu'au bout:
Mais Dieu grand Astrologien,
Le tempere souuent si bien
Qu'il change nature en becquarre:
Parquoy de se vouloir enquerre
Quelle trempe il luy donnera,
Ou quantes fois il tonnera,
Ou quantes fois aurons orage,
Pensez si c'est fait d'homme sage.
Laissons donc ce que ne sçauons,

Et reuenons à noz moutons.

Gens gras, repiets, portemalettes,

Coches avec leurs grosses tettes

Auront cest esté bien affaire,

Et le meilleur qu'ils pourront faire

Sera de souffler hault & bas,

Et prendre souuent leurs esbats

A rafraichir cest estomac.

Toutesfois, garde le basac

De tant refroidir la bedaine,

Qu'vne belle fiure soudaine,

Tierce, & puis continue apres,

Trop tost les enuoye ad patres.

Enfans gardez ces fruiçts nou-

ueaux,

Vous qui cheuauchez sans housseaux,

Prenez garde à ceste matiere:

En esté quand l'huy de derriere

Se'ure, c'est vn mauuais catus

Mil & mil en sont abbatu

Tous les ans par mal se garder:

Il y fault donc bien regarder.

Le Soleil en fin de l'esté

En lieux ou il aura esté,

Se peut eclipser, & voir trouble:
Ou bien rouge cōme vn faux double.
Cela faschera plusieurs gens
Qui auront esté negligens
De le voir leuer tous les iours:
Car par faire au liēt longs seiours,
Le Soleil souuent d'eux s'absente.
Toutesfois qu'en l'annee presente
Viendra d'vne autre occasion:
Hoc est, de l'opposition
De terre, entre luy & la Lune.
Par Lune i'entens la pecune;
Car elle ha d'argent la couleur.
Par terre, i'entens le labeur,
Id est, grand trauail, & grand peine,
Non pas à gagner drap ou laine,
Mais à faire l'argent voler:
Car à s'esbatre & rigoller,
On prend grand trauail & fatigue:
De sorte que par telle brigue
Le Soleil est souuent contrainct
S'obscurcir & n'apparoir point.
cest esté, gens chauds de nature
Par trop s'eschauffer d'auenture

Engherront en fieures ardentés;
Pleuresies fause, ou euidentes:
Et là Barbiers à voz scignees,
Que ces veines me soyent galecs,
Voyla comment on y procede.

Passons outre, il n'y a remede,
Encor nous fault-il dire vn mot.
Cest esté nul ne soit si sot
De trauailler plus que de droict.
Si le vent de Midy souffloit,
Comme ie croy qu'il soufflera,
Mal pourueu s'en repentira:
Puis dites, c'est vne influence
De mauuais aer: la doleance
En vient en partie: mais exces
Souuent fait perdre le proces,
Tort ou droict, sans autre raison.
Difons de l'arriere saison.

L'ARRIERE SAISON.

L'Esté s'enfuit en diligence,
Quand l'arriere saison commence:
C'est la part la plus fructueuse
De l'annee, & la plus fascheuse:

Car quand tous biens font amassez,
On dit que ce n'est pas assez
Qui n'a santé. Or est-il seur
Que ce tēps fait souuent grand peur,
A ceux qui ont fort grande enuie
De long temps demourer en vie,
Ou pour le plaisir qu'ils y ont,
Ou pour les grans biens qu'ils y font:
Or n'y a il plaisir qui tienne,
Ne si riche qu'au poinct ne vienne.
Quand ce temps est mal disposé,
Ie ne sache Roy si osé,
Ne prince ou seigneur si hardi,
Qui du lundi iusqu'au mardi,
Puisse differer ou attendre.
Et si ie pensois bien entendre
Les causes de telle influence,
Ie vous en dirois ma sentence:
Mais ie tiens & croy fermement
Qu'il ny a que Dieu seulement,
Qui cognoisse ce grand secret.
Et ne fault qu'y ayez regret,
Messieurs les astrologateurs,
Si ie vous appelle menteurs.

En tel cas, le ne dis que biens:
Car qui deuine, ne sçait rien
Au vray, sinon par aduenture.
C'est assez dict de la nature
Des quatre parties de l'annee:
Je poursuyurois autre mence,
Et dirois en particulier
Du temporel, & seculier,
Des Princes, & des trois estats,
Où i'ay d'argumens vn grand tas,
Que maintenant ne puis produire,
Pour ce qu'ailleurs me fault reduire
Le temps qu'y pourrois consumer:
Car c'est vn poinct à presumer
Qu'esprit en deux lieux ententif
Ne peult par tout estre hastif:
Et dit-on que qui trop se haste,
A la fin son ouurage gaste:
Par quoy me vault mieux differer
En autre temps, que proferer
Quelque cas, en lourde maniere
Qui peust gaster nostre matiere:
Vne autrefois qu'aurons loisir,
En deuiscrons à plaisir.

F I N.

Handwritten text, likely bleed-through from the reverse side of the page. The text is extremely faint and illegible due to the quality of the scan. It appears to be a list or a series of entries, possibly names and dates, but the characters are too small and light to transcribe accurately.